

Hset I Corinhtho

1 ...

Bàu bôch hmàih..

Phaulô , tiaq manoh Boc Plinh khoe jah creo broq mangai Tiaq cla da Chuaq Jesus Christ , pajùm ka Sothen oh daq bèn , ² Achih am ka Tagop Hadròeh da Boc Plinh oe ta Corintô , aih bài mangai khoe jah basròeh enh dalam ka Chuaq Jesus Christ , khoe jah creo mangai hadròeh , xam ka rìm ngai ma creo dang yiniq Chuaq Jesus Christ , aih Chuaq da bèn xam da wì aih yac ka wì oe taleq. ³ Waiq ka oh daq jah kan tabàih dech xam kan catèm enh Boc Plinh , Baq bèn, xam Chuaq Jesus Christ.

Bàu manè apôi ...

⁴ Au ùh hêq ka manè apôi Boc Plinh , majah qmang aih kan tabàih dech Haq khoe am ka oh daq enh dalam ka Chuaq Jesus Christ, ⁵ majah qmang aih enh dalam ka haq oh daq khoe jah padrông rìm trong , enh bàu capoch trùh kan rabiaq ,⁶ Qmang ka bàu nhèn anoe trùh Christ khoe jah cajap taqne oh daq . ⁷ Oh daq ùh blat qmòe mòi qmòe kan tabàih leq enh Yiang Hadròeh jò oh daq qnang ngèh gòm Chuaq Jesus Christ bèn trùh . ⁸ Haq aih ma broq ka oh daq jah cajap manoh trùh lùch trùh gèh , dôi trùh hì Chuaq Jesus Christ da bèn oh daq ùh hiaq i qmòe ajang leq ma ep cwò. ⁹ Boc Plinh aih ùh tablòq manoh , haq khoe creo ka oh daq jah taqmùt ti Chuaq Jesus Christ kon haq , aih raq Chuaq da bèn.

Thê mòi manoh ka dabau ...

¹⁰ Au canòm ka yiniq Chuaq Jesus Chuaq da bèn , òeq hu pariaq diq ka oh daq ep pajùm mòi bàu capoch , apaq lah òeq dabau mòi ep mòi manoh mòi cliac ti dabau . ¹¹ Majah qmang aih , enh bài mangai ma oe ta hnim Kolo-ê , au i hia bàu doe taqne pì oh daq i kan tagrinh ka dabau . ¹² Au enh doe taqne oh daq i mangai doe qmang kô “ Au tiaq Phaulô” qnah ngai qnoeq doe “ Au tiaq Abo-lô” mangai qnoeq doe “ Au tiaq Sêpha”.Maqnoeq hò mòi doe “ Au tiaq Christ” . ¹³ Aleq Christ khoe lah broq baiq qmòh ? Ahiaq Phaulô khoe chiut tiang òeq talong pagat am ka oh daq , tàng ùh meh oh daq khoe canòm ka yiniq Phaulô òeq broq baptem ajoq ? ¹⁴ Au manè apôi Boc Plinh majah qmang aih enh gùng ka Korit-bu xam Gai-ut , taqne oh daq au qnhòq lah broq baptem am ka cabô , ¹⁵ dôi ùh hiaq i cabô doe oh daq khoe yòc yiniq au òeq broq baptem . ¹⁶ Joq au i broq baptem ka mangai ta hnim Sepha-na , enh gùng ka hnim aih au pì hmàng òeq khoe broq baptem am ka cabô hò mòi. ¹⁷ Majah qmang aih Christ thê au trùh ùh xài òeq hu broq baptem , mòi òeq hu anoe hnài Bàu lem , hadai ùh xài hnài xi hacùng bàu rabiaq da kon mangai , òeq kan i cwiang itai long pagat da Chuaq Jesus Christ ùh hia loh ka qngwan qngwaiq . ¹⁸ Majah qmang aih , bài mangai ma nhung lùch wì doe bàu ma hnài trùh long pagat aih kan ratùt , mòi da bèn mangai ma khoe jah òeq aih raq cwiang itai da Boc Plinh . ¹⁹ Majah qmang aih i bàu khoe achih :

“ Au raliang òeq kan rabiaq da mangai rabiaq ,

Au palùng òeq kan loq da mangai loq” .

²⁰ Mangai rabiaq oe taleq ? Mangai hnài ranenh taleq ? Mangai rabiaq ka hadrah qnhòng kô oe taleq? Ajoq Boc Plinh khoe broq kan rabiaq da crông taneh kô loh ka ratùt ùh ? ²¹ Majah qmang aih taiq crông taneh kô canòm dèh kan rabiaq cla ,ùh canòm kan rabiaq da Boc Plinh òòeq hu canau ka Boc Plinh , dài haq majah lem bùi dèch bài mangai i manoh lùì ajang bàu hnài da mangai blùng tiah ka nhèn . ²² Jò mangai Juda bòch toq kan halac ,mangai Gorec chaq toq kan rabiaq , ²³ mahaq nhèn anoe toq Christ tiang đình talong pagat , aih kan catoeh ka mangai Juda , mangai diac wì doe aih kan blùng . ²⁴ mahaq da bèn mangai ma khoe jah creo yac ka mangai Juda yac ka mangai Gorec Christ aih kan itai xam kan rabiaq da Boc Plinh . ²⁵ Majah qmang aih kan blùng da Boc Plinh aih rabiaq yeo hnau kan rabiaq da mangai , kan ùh nèn da Boc Plinh aih yeo dèh ka padren mangai .

²⁶ Hèm beq ! taqne pì oh daq ma khoe jah creo , tiaq qnhòng kô pì ùh i bác ngai rabiaq, ùh bác ngai i cwiang , ùh bác ngai rahù ranhòm . ²⁷ Mahaq Boc Plinh khoe yóc kan blùng ta crông taneh òòeq broq ka mangai rabiaq camaih , Boc Plinh yóc kan ùh nèn ta crông taneh òòeq baxep ka mangai tadèh . ²⁸ Boc Plinh khoe yóc kan ùh cra , kan wì ma jù lê cađac , xam bài yiniq ùh hnoq , òòeq broq bài yiniq xau hnoq loh ka pì hnoq , ²⁹ òòq ùh i mangai leq jah padèch rađeh enh ngèa Boc Plinh . ³⁰ Qmang aih ,canòm ka haq oh daq ma khoe jah oe ta Chuaq Jesus Christ aih Mangai Boc Plinh ma khoe broq haq wia kan rabiaq , kan taq ataq , kan hadròeh xam kan dèch diq ka bèn. ³¹ òòeq tiah ka bàu ma khoe achih “ Cabô catèh rađeh , ep catèh enh dalam ka Chuaq” .

2 ..

Bàu hnài da Phaulô ...

¹ Jò au trùh ti oh daq , au ùh yóc bàu haqnèq bàu rabiaq hu hnài òòeq oh daq jah loq kan pa nhìn da Boc Plinh . ² Majah qmang aih , au khoe qnac òòeq dèh ta manoh: oe taqne oh daq , au ùh qnì cleq loe enh gùng ka Chuaq Jesus Christ , èh Chuaq Jesus Christ khoe tiang đình talong pagat . ³ Jò oe taqne oh daq , au joq pì nac canèn cleq , toq yùq crè rai tarìt . ⁴ Enh bàu hatuàng trùh bàu hnài da au ùh xài loh enh kan rabiaq ka capoch , mahaq loh enh kan mahno da Yiang Hadròeh xam cwiang itai , ⁵ Òòq oh daq ùh hiaq òòeq dèh manoh lùì ajang kan rabiaq kon mangai , mahaq ajang kan itai da Boc Plinh .

Kan rabiaq enh Plinh

⁶ Hnoq anoe qmang aih , nhèn hnài kan rabiaq ka bài mangai ma khoe gèh mangai , mahaq ùh xài enh kan rabiaq ta qnhòng kô , ùh xài kan rabiaq enh mangai wèq qnhòng kô , aih la bài mangai padon raliang hnhung . ⁷ Nhèn hnài kan rabiaq da Boc Plinh , aih raq kan hlèp ma khoe cadöc enh bài qnhòng adroe , Boc Plinh ma khoe palauq adroe òòeq am ka bèn kan ranhòm. ⁸ Mangai ma wèq cwiang ta qnhòng kô ùh i mòeq ngai leq ma loq trong aih , majah qmang aih tàng joq wì loq wì khoe ùh tiang đình Chuaq ranhòm talong pagat . ⁹ Mahaq i bàu achih rameh :

“ Aih bài yiniq mat qnhòq hnoq ,don qnhòq tàng ,
manoh mangai hadai qnhòq hèm trùh.

Mahaq Boc Plinh khoe padon qmòe bài yiniq aih ,đòeq am dèh ka mangai loq waq ka haq”.

¹⁰ Boc Plinh khoe canòm ka Yiang Hadròeh đòeq mahno ka bèn bài yiniq aih , majah qmang aih Yiang Hadròeh sreò loq dồng rìm trong , loq xam bài kan hlèp ta manoh Boc Plinh .¹¹ Majah qmang aih , tàng joq ùh xài yang oe ta cliac manoh mangai ,aih cabô ma loq ta manoh cliac mangai qmang leq? Hanoh qmang aih , ùh i cabô loq ka manoh Boc Plinh enh gùng ka Yiang Hadròeh da Boc Plinh .¹² Yiang bèn ma khoe jah manòeq kô ùh xài loh enh crông taneh ,mahaq bèn khoe jah yòc enh Yiang Hadròeh da Boc Plnh , đòeq bèn loq canau ka bài kan tabàih bèn ma jah enh Boc Plinh .¹³ Anoe trùh kan tabàih aih ,nhèn ùh yòc kan rabiaq kon mangai đòeq hu hnài trong aih ,mahaq canòm kan rabiaq enh Yiang Hadròeh , yòc bàu yang anoe hnài trong yang .¹⁴ Mangai ùh i ka Yiang Hadròeh ùh lùì bài yiniq trùh enh Yiang Hadròeh ,majah qmang aih haq aih hnoq trong aih budàng kan ranhù , ùh hlàt loq majah qmang aih ep hadro ngan tiaq trong yang .¹⁵ Mahaq mangai i yang aih haq hadro ngan rìm yiniq , cla haq hadai ùh hiaq ep waq ka i cabô hadrah cla radèh .¹⁶ Majah qmang aih ,cabô ma khoe loq ta manoh Boc Plinh , đòeq hu hnài haq ?.Mahaq da bèn aih i manoh da Christ.

3...

Tagop hadròeh xam mangai qnong ngoe...

¹ Qmang aih oh daq au , au enh capoch tuàng ka pì tiaq ka mangai rih tiaq Yiang Hadròeh mahaq ùh jah , mahaq tiaq ka mangai oe raq xech akia ,tiaq ka kon hin enh dalam ka Christ .² Au yòc diac tồh qmì oh daq , ùh qmì xi dahwèq cadoq , majah qmang aih oh daq ùh hlàt acaq ,trùh manòeq dua qnhòq hlàt , majah qmang aih oh daq oe raq xech akia .³ Joq , enh dalam pì oh daq oe raq i kan tagit ,talech aih ma ùh joq oh daq oe raq ta xech akia rih tiaq ka mangai crông taneh kô qmòh ?⁴ I qnah ngai doe “ Au tiaq Phaulô ,qnah ngai doe : Au tiaq Abôlo ,qmang aih pì i crài cleq ka mangai qnoeq qmòh ?⁵ Abôlo aih cabô ? èh Phaulô aih cabô? Aih bài mangai hapõng , enh wa aih oh daq khoe jah lùì ,wa mangai abroq dèh hra trong Chuaq khoe thê .⁶ Au khoe pìt ,Abôlo khoe pùc mahaq Boc Plinh ma broq ka yòng kàn .⁷ Qmang aih ,mangai pìt mangai pùc diq ùh loh cleq , mahaq Boc Plinh ma broq ka yòng kàn .⁸ Wa mangai pìt wa mangai pùc diq daq adàng ka dabau , mangai jah dèh hra kan baha tiaq deh wa ma khoe broq pang leq.

Christ aih rangàu da TagopHadròeh....

⁹ Nhèn kô hanoh mòeq bua wiang patih ka Boc Plinh , oh daq aih rùàng da Boc Plinh abèq, hnìm da Boc Plinh broq .¹⁰ Tiaq kan tabàih Boc Plinh am , au khoe tàc xàn hnìm tiaq ka mangai thòq rabiaq , i mangai qnoeq trùh broq enh qnhèq ka aih , mahaq mangai leq mangai meh ep rabiaq deh hra yiniq wì ma khoe broq enh qnhèq ka xàn aih .¹¹ Majah qmang aih ,ùh i cabô jah broq ònh xàn qnoeq enh gùng ka xàn ma khoe tàc : aih la Chuaq Jesus Christ .¹² Tàng i cabô yòc wang ,bac, hmo ngóc ,long , nhat croh ,hri croh đòeq broq enh qnhèq ka xàn aih .¹³ Yiniq broq da tang ngai thòq diq jah paqnoh hnoq dồng . Majah qmang aih hi trùh dèh hì bài yiniq broq aih hi jah qnoh dồng taqngah , haq jah paqnoh ta ùnh , ùnh èh ma qnhro ngan yiniq broq da tang ngai .¹⁴ Tàng yiniq broq da cabô khoe broq enh qnhèq ka xàn aih ùnh

ùh hiaq cheo ,aih èh haq hi jah dèh kan baha.¹⁵ Tàng yiniq wì haq khoe broq ùnh cheo dǝng , aih pi jah baha cleq .Cla haq aih èh jah dèch ,mahaq tiaq taiq bu clech ka ùnh.

¹⁶ Oh daq ma ùh loq raðeh aih raq hnim kùh waiq da Boc Plinh , Yiang Hadròeh da Boc Plinh oe enh dalam ka oh daq qmòh ? ¹⁷ tàng i cabô raliang ðac hnim kùh waiq da Boc Plinh , aih èh Boc Plinh raliang ðac mangai aih . Majah qmang aih ,hnim kùh waiq da BocPlinh aih hadròeh , oh daq raq hnim kùh waiq. ¹⁸ Apa q i cabô qnùt dèh raðeh : Taqne oh daq tàng loq i mangai leq xoh ðeh rabiaq tiaq dua qnhòng kô , thê drah wia mangai ùh qnì ðòeq hu jah kan rabiaq , ¹⁹ majah qmang aih rabiaq tiaq dua qnhòng kô , enh ngèa Boc Plinh aih kan blùng . Qmang ka bàu khoe achih “Chuaq rùp mangai rabiaq ta kan rabiaq cla wì” .

²⁰ Èh hòm “ Chuaq loq ka manoh mangai rabiaq , haq loq trong wì hèm aih ðiq ùh loh cleq”.

²¹ Qmang aih , oh daq pi dùh catèh dèh mangai ma qnong ngoe pì hòm! Rìm yiniq oe ðiq ta oh daq. ²² Yac ka Phaulô , yac ka Abôlo ,yac ka Sêpha yac ka crǝng taneh kô , yac kan rih kan cachit , yac ka yiniq manòeq kô , yac ka bài yiniq tangèa kô èh .aih ðiq da oh daq , oh daq aih da Christ , Christ aih da Boc Plinh.

4 ..

Hapǝng joq qnàng da Christ

¹ Qmang aih thê pì mangai leq mangai meh ngan nhèn tiaq ka hapǝng da Chirst ,mangai wèq kan hlèp da Boc Plinh . ² Manòeq kô , trong wì ma ngèh ajang mangai ma wèq kan hlèp aih haq ùh gǝpla. ³ Cla au manòeq kô yac ka oh daq tah hadrah ka au , yac ka hnim hadrah da kon mangai hadrah ka au , dua au ùh lèt cleq , cla au hadai ùh tah hadrah ka raðeh . ⁴ Majah qmang aih au ùh i hnoq raðeh i yiniq lui cleq , mahaq au ùh canòm ajang aih ðòeq hu jah kan taq ataq : Chuaq aih Mangai ma hadrah au . ⁵ Qmang aih , yac ka i yiniq cleq apa q rênh hadrah hrin thê gǝm Chuaq trùh , haq jah paqnoh taqngah yiniq wì ma cadoc ta clam , mahnu trong wì ma qnac ta manoh, jò aih èh enh Boc Plinh tang ngai hi jah dèh hra kan manè ðeh matroq ka jah .

⁶ ðiq ka oh daq, manòe kô aih taiq oh daq, au majah anoe trùh cla au xam Abôlo waq ka oh daq ngan dua ma “Apaq cadiang loe ka bàu khoe achih”, èh apa q i manoh loq cateh , tiaq mangai kô hu tajraq ka mangai qnoeq. ⁷ Majah qmang aih , cabô ma khoe lah ih yeo crài ka mangai qnoeq . I yiniq cleq ih ma qnhòq jah yǝc ðeh qmòh ? tàng joq ih khoe jah yǝc dǝng ðeh , meh gleq ih ma oe raq cateh tiaq ka raðeh qnhòq hmaq jah qmòe cleq? ⁸ Oh daq khoe tau rìm yiniq ,khoe jah panàc ,padrǝng ,ùh canòm ka nhèn , oh daq khoe wia tiaq ka bùa , joq ngèh ka oh daq jah wia bùa dǝq nhèn hadai jah wia bùa ti oh daq !. ⁹ Majah qmang aih au hèm Boc Plinh khoe yǝc qnoh ma broq mangai Tiaq cla atiq dǝng ka mangai qnoeq , tiaq ka mangai i tuiq wì rùp clèh gǝm toq hi cachit , tiaq kan racaih ka crǝng taneh kô , ðòeq ka bình plinh xam kon mangai wiang ngan hnoq. ¹⁰ Nhèn blùng ðeh ka Christ, mahaq oh daq jah rabiaq enh dalam ka Christ, nhèn ùh nèn oh daq jah tadèh , oh daq jah haqnhèq nhèn loh ka hamoq. ¹¹ Trùh manòeq nhèn oe raq pangot hrah croh ranǝng , hyah hyai ,wì tep da nhèn ta hadrò , ùh i ðeh ka nòe oe . ¹² Nhèn yǝc ðeh ti kǝng hu patih abroq, jò wì ra-òh hamaiq ka nhèn , nhèn caxoex xǝp ramot ka wì, jò wì ti rùp , nhèn chiùq àt , ¹³ jò wì tapcoch ðech ka

nhên ,nhên têu lem laq alàng, trùh manòeq nhên tiah taiq ka cràc ta phù crông ,tiah taiq ka khênh ta crông taneh.

Bàu pariaq....

¹⁴ Au achih qmang kô ùh xài waq ka oh daq camaih mahaq òeq pariaq oh daq qmang ka kon cla au ma ha-och dèh. ¹⁵ Majah qmang aih, yac ka enh dalam ka Christ oh daq i mòeq jàt mùan mangai hnài , mahaq oh daq ùh i bắc ngai baq,majah qmang aih au khoe yóc Bàu lem òeq ha-uang oh daq ta dalam ka Chuaq Jesus Christ . ¹⁶ au yóc yiniq aih pariaq oh daq : Drah top dua au". ¹⁷ Aih iq, au majah khoe thê Timôthe ,haq aih mangai au loq waq deh , mangai kon diq ka manoh ti au ta Chuaq , trùh ti oh daq ,òeq bahmàng hlài ka oh daq loq trong da au enh dalam ka Christ ,hloe xam bàu au khoe hnài qmang leq roc Tagop Hadròeh oe jàp jia. ¹⁸ I bài mangai enh dèch hnhè ràdèh , hèm dèh au loq pi trùh ta oh daq hòm. ¹⁹ Mahaq tàng lem ka manoh Chuaq ,au rênh trùh ti oh daq, òeq ngan waq ka loq , ùh xài ngan toq bàu capoch da bài mangai loq hnhè dadeh aih , mahaq òeq ngan padren wì haq dàng leq cadèh. ²⁰ Majah qmang aih , diac Boc Plinh ùh xài toq ajang bàu capoch mahaq oe ajang padren . ²¹ Oh daq enh maleq ? Enh au wê long dùl trùh ti oh daq loq au qnàng kan loq waq xam manoh lem hu trùh ti pi?

5..

Kan qmèq ta Corinto

¹ Au i hia bàu anoe jàp jia ,wì doe taqne oh daq i kan tango anang , tango qmang aih yac ka wì mangai enh gùng jì ùh lòh : Aih taqne oh daq i ngai tango ka cadri dèh baq ² Aih cadoe oh daq oe cahnèh ràdèh! Oh daq ùh i ha-on mào, òeq jah hnan qnoh òac mangai tango aih loh ma khoe ka oh daq. ³ Au kô, yac cadoe chac au hangai mahaq mahua yiang au oe ti pi . Au khoe dèch taqmòq yiniq lui ka mangai broq qmang aih tiah ka au hadai oe ti pi . ⁴ Qmang aih jò pi tagop ti dabau enh dalam ka yiniq Jesus Chuaq bèn , mahua yiang au pajùm ti pi , cwìang itai da Jesus Chuaq bèn oe ta aih . ⁵ canòm ka cwìang aih ,bèn jao mangai kô ka Satan raliang òac chac haq , òeq trùh hì da Chuaq mahua yiang mangai kô jah dèch . ⁶ Oh daq hnhè ràdèh ùh i lem cleq ! Oh daq ma ùh loq toq xit blo broq bình ka cadap òac loh ka rêu òng qmòh ? ⁷ Drah broq ka ràdèh hreo ka blo dùnh beq , òeq oh daq jah tiah ka òac neo ùh tah blo qmang ka oh daq aih bèn ùh tah blo . Majah qmang aih , Christ aih kon trùh ramèn Pancwa da bèn , wì khoe jêh . ⁸ Qmang aih bèn wèq ramèn ,apaq wê blo dùnh , blo ngang dù mahaq wê bèn ùh tah blo , bèn da manoh lem jang xam trong joq qnàng. ⁹ Ta jàiq yàng adroe au achih ka oh daq i tanap apaq taqmùt ka mangai loq tango , ¹⁰ aih ùh xài au anoe pajùm trùh mangai loq tango anang ,mangai daiq plai, mangai loq lúc xam mangai kùh waiq kiác qmù ta qnhòng kô . Tàng joq qmang aih ajoq oh daq ep cadac crông taneh kô . ¹¹ Mahaq au achih òeq doe ka oh daq apaq broq bua ti mangai doe hadai bèn ,mahaq tango, daiq plai ,kùh waiq kiác qmù , xoc hanip , bù bia , loq lúc òac mangai qnoeq , ùh acaq pajùm ti mangai qmang aih . ¹² Mangai enh gùng aih ep cleq ka au ti hadrah? Ma ùh joq oh daq ep hadrah mangai enh dalam qmòh ? ¹³ Wì enh gùng i Boc Plinh hadrah wì haq . Drah qnoh òac mangai dù loh khoe ka oh daq .

6.....

Tah hadrah ka da bau

¹ Jò oh daq loh yiniq ti dabau ,gleq majah hùà òòeq ka mangai ùh taq atoq hadrah, ma ùh òòeq ka mangai hadròeh hadrah.² Oh daq ma ùh loq bài mangai hadròeh kô èh ma hu hadrah òòeq crõng taneh qmòh ? ³ Oh daq ma ùh qnì bèn kô èh hadrah bài bình plinh qmòh ? loq ka bài yiniq qnhòng kô . ⁴ Qmang aih , jò oh daq loh bài ka dabau tiaq bài yiniq ta qnhòng kô , hagleg majah yòc bài mangai ùh loh qmòe cleq enh ngèa ka Tagop Hadròeh broq mangai hadrah !⁵ Au doe qmang aih òòeq oh daq camaih. Enh dalam ka oh daq ma ùh i ka mangai yeo rabiaq òòeq hadrah taqne oh daq bèn qmòh ? ⁶ Mahaq jò oh daq loh yiniq , cadoe qnoh enh ngèa ka mangai ùh lùì ! ⁷ Joq qmang aih , oh daq tah hadrah ka dabau aih khoe i tuiq . Hagleg ma ùh waq àt , aih xài yeo lem ? hagleg ma ùh waq da haq wì hnen raðeh aih xài yi hnau! ⁸ Mahaq cla oh daq raq broq ùh troq ,ti habo ðac ka wì ,khoe aih tah hadrah glòq ka oh daq . ⁹ Oh daq ma ùh qnì bài mangai ùh taq atoq i ka jò leq jah ðiac Boc Plinh? ¹⁰ Cla apaq qnùt raðeh : Mangai loq rùp tango , kùh waiq radua qmù, mangai taqnung ka wì, mangai gucalô waq ka hadai gucalô , mangai gucadri waq hadai gucadri , mangai atùng , mangai ðaiq plai ,mangai bù bia , mangai toq hanip , mangai loq taq atam , ðiq ðõng ùh maleq jah waq ðiac Boc Plinh . ¹¹ Nèh haq , taqne oh daq hadai i qnah ngai rih qmang aih , mahaq canòm ka yiniq Chuaq Jesus xam Yiang Hadròeh da Boc Plinh bèn ,oh daq khoe jah qnheo hreo , jah hadròeh, khoe jah creo mangai taq atoq .

Pariaq wia ka hangai kan ùh lem.

¹² Pì doe “Rim yiniq ðeh ðiq jah broq”, mahaq ùh xài rìm yiniq ðiq i lòeq , “ Au jah broq ðiq rìm yiniq” mahaq au ùh òòeq yiniq cleq jah panan au. ¹³ Dahwèq acaq òòeq ka cliac , cliac òòeq ka dahwèq acaq ,mahaq èh Boc Plinh raliang ðac ðiq baiq . Mahaq chac hamac ùh xài palauq òòeq ka tango anang , mahaq òòeq ka Chuaq , èh Chuaq òòeq ka chac hamac .¹⁴ Boc Plinh khoe broq ka Chuaq rih hlài ,èh haq yòc ðeh cwiang aih raq òòeq broq ka bèn hadai rih hlài .¹⁵ Oh daq ma ùh qnì chac hamac bèn aih xài jènì ti da Chirst qmòh ? Qmang aih bèn akhòh yòc jènì ti da Christ òòeq taqmùt broq mòeq ti mangai broq ði ùh? Ùh jò leq !. ¹⁶ Oh daq ma ùh qnì cabô taqmùt ti mangai broq ði , aih khoe wia mòeq xech ti haq ? Majah qmang aih khoe i bàu doe rameh “Wa baiq ngai jah wia mòeq xech akia ” . ¹⁷ Mangai leq taqmùt pajùm ti Chuaq aih èh haq jah wiaq mòeq manoh yiang ti Haq .¹⁸ Drah wia ka trong tango anang , yac ka wì broq yiniq lui cleq , aih ðiq oe enh gùng ka chac hamac cla , mahaq cabô caqnìh raðeh ta kan tango anang aih i tuiq ka chac cla. ¹⁹ Oh daq ma ùh qnì ðeh ka chac hamac aih raq hnìm kùh waiq da Yiang Hadròeh ,Yiang qnang oe enh dalam ka oh daq, Yiang oh daq ma khoe jah enh Boc Plinh ? Chac hamac oh daq pì oe xài da cla hòm. ²⁰ oh daq khoe jah baxon yòc hlài ðiq jaq canaq. Qmang aih , drah yòc chac hamac oh daq òòeq ðèch kan ranhòm ka Boc Plinh beq .

7

Trong yòc õng mai qnhòng kô .

¹ Anoe trùh bài yiniq oh daq khoe achìh jàiq bòch au , au hèm gucalô ùh yòc mai aih yeo lem .² Mahaq waq ka jah wia ka rìm trong tango anang ,mangai gucalô ep yòc mai , mangai cadri ep yòc õng. ³ Gucalô ep gèh yiniq õng mai ðeh ti cadri , cadri haq hadai qmang aih . ⁴ Mangai

mai ùh i ka cwiang cleq ta chac cla rađeh , mahaq ðòeq dèh ka òng . Hadaï qmang aih , mangai broq òng hanoh ùh i ka cwiang cleq ta chac cla rađeh mahaq ðòq dèh ka mai . ⁵ Apa q blah yòc da dabau cwiang aih , enh gùng ka jò cla wa baiq ngai khoe mòeq manoh ti dabau oe ðò hòeq , ðòeq hu waiq khàn, khoe aih drah tawih hlài ti dabau , yùq èh jò oh daq wèq rađeh ùh jah Satan loq padò qnùt. ⁶ Au caqnaih qmang aih, ùh xài au thê broq . ⁷ Au ma enh aih rìm ngai jah tiah qmang ka au, mahaq Boc Plinh khoe am dèh hra tang ngai , mangai kô qmang kô ,mangai tau qmang tau. ⁸ Qmang aih ,au doe ka mangai qnhòq yòc òng mai xam mangai hadrô : aih yeo lem ka pì, tàng jah oe qmang ka au . ⁹ Mahaq tàng wèq rađeh ùh jah, pì ep yòc òng mai beq , aih ùh hnau ka ðòeq kan enh tachac bùh pì qmang ka ùnh .

òng mai rih ti dabau....

¹⁰ anoe trùh mangai khoe yòc òng mai , aih au ,mahaq uh xài au ,ma joq aih Chuaq, thê mai ùh jah cađac òng , ¹¹(mahaq tàng khoe cađac, haq khòh oe qmang aih raq ,apaq yòc ònh òng qnoeq ,ùh meh ep hatroq hlài dèh ti òng) yac ka òng hadai ùh khòh cađac deh mai . ¹² mangai ma qnoeq hòh , ùh xài Chuaq ,mahaq au ma doe : Tàng cabô leq i mai ùh pajùm manoh lùì ti oh daq , mahaq chiùq rih pajùm lùch ka qnhòng ti rađeh , aih ùh jah cađac . ¹³ Gucadri hadai qmang aih , i òng ùh pajùm mòeq manoh lùì ti rađeh mahaq chiùq rih pajùm lùch ka qnhòng ti rađeh , aih èh mai hadai ùh jah cađac òng . ¹⁴ Majah qmang aih , òng ùh lùì Chuaq mahaq ajang mai haq aih èh haq jah wih wia hadròeh hatiaq dèh mai , mai ùh lùì Chuaq mahaq ajang òng haq aih èh haq jah wih wia hadròeh hatiaq deh òng , ùh qmang aih cadèh , bài kon oh daq nèh ùh i hadròeh ,yàng manòeq diq khoe hadròeh. ¹⁵ Tàng mangai ùh lùì enh ta cađac ,aih hi ðòq haq cađac : Jò aih yac ka oh daq calô ,oh daq cadri ùh ep tawac cleq . Boc Plinh khoe creò ka oh daq rih ka catèm

¹⁶ Mangai broq mai ,ìh ma loq broq braiq ìh jah dèch deh òng? Mangai broq òng ,ìh ma loq broq braiq ìh jah dèch dèh mai? .

¹⁷ Hnoq anoe qmang aih, rìm ngai diq ep rih qmang ka Chuaq khoe am ka dađeh , tiaq qmang ka Boc Plinh khoe creò . Aih raq bàu au ma khoe hnài diq ðòng rìm Tagop Hadròeh ¹⁸ I mangai leq khoe broq ranenh kat akia , atiq ka aih men jah Chuaq creò ? wèq deh qmang aih raq. I ka mangai leq qnhòq broq ranenh kat akia mahaq jah creò? Ùh dùh broq ranenh kat akia . ¹⁹ Kat akia ùh i hagleq ,yac ka ùh kat akia hadai ùh i hagleq , trong ma khòh nhet aih wèq ranenh da Boc Plinh thê . ²⁰ Mangai leq jah creò, nèh haq oe caloeh leq ,ep oe dèh caloeh aih raq . ²¹ Ìh jah creò jò ìh qnang broq hapõng ùh xài ? Apa q lèt dèh, mahaq tàng bu i dua jah claih ka broq ðic, aih apa q batrò . ²² Majah qmang aih ,mangai qnang broq hapõng jah Chuaq creò ,aih Chuaq khoe caqnaih haq ,hadaï qmang aih diq , mangai qnang broq dèh cla mahaq jah creò , aih haq ep broq hapõng da Christ . ²³ Oh daq khoe jah rot hlài diq jah canaq , apa q broq hapõng cabô hòh. ²⁴ Jò jah creò oh daq oe caloeh leq , oh daq ep oe qmang aih raq enh ngèa ka Boc Plinh

Ùh yòc òng mai

²⁵ . Anoe trùh mangai ùh yòc òng yòc mai , au ùh i jah bàu enh Chuaq thê , mahaq canòm ka kan loq waq enh haq , au khoe wia mangai khòh lùì ,dài au majah i bàu hnài . ²⁶ Taiq kan nanxa padon trùh , au hèm mangai gualô oe deh qmang aih raq ma yeo troq . ²⁷ Ìh khoe yòc

mai ajoq ? apaq ti chaq trong hu cađac , ih qnhòq yóc mai ajoq ? Apaq chaq mai .²⁸ mahaq tàng ih yóc mai ,ùh i troq cleq ,tàng mangai gucadri sriu yóc óng hadai ùh troq cleq . Mahaq mangai yóc óng mai i kan xalep ta chac ,au enh oh daq claih trong aih .²⁹ Au enh anoe ka oh daq qmang kô, bèn oe crông taneh ùh dùnh .Pang kô ta èh mangai i mai khòh tiah ka mangai ùh i ka mai .³⁰ mangai qnang hmoe khòh tiah mangai ùh hmoe , mangai qnang bùi ,khòh tiah ka magai ùh bùi , mangai qnang rot khòh qmang ka mangai ùh rot jah cleq³¹ Mangai i kùng hang ta crông taneh khòh qmang ka mangai ùh i cleq, majah qmang aih crông taneh bèn hnoq kô èh hi hnhung.³² Au enh diq ka oh daq ùh bakènh tawac qmòe cleq . Mangai leq ùh yóc mai aih haq jah patih toq ka Chuaq , chaq trong broq lem manoh Chuaq.³³ Mangai leq khoe yóc mai aih èh haq ep patih ka yiniq broq ta qnhòng kô , chaq trong broq lem ka manoh deh mai .⁴³ Mangai gucadri i óng xam mangai adrùh sriu hadai crài ka dabau : Mangai ùh yóc óng ,aih haq jah patih toq ka Chuaq , mahaq da mangai ma i óng aih haq patih toq bài yiniq broq ta qnhòng kô ,waq ka lem manoh deh óng .³⁵ Au anoe qmang aih òeđeq i lòeq ka oh daq , ùh xài au bet jroh oh daq , mahaq òeđeq yong tic oh daq tiaq trong matroq òđq oh daq ùh hiaq rangòt ta manoh jò patih ka Chuaq .³⁶ Tàng joq i mangai calò leq hèm ðeh kô ùh troq broq ka mangai têu bàu yóc rađeh ep gòm loh qmòe ka craq hadrang , manòeq kô haq enh yóc deh mai aih, aih òđq wa yóc dabau ,qmang aih troq .Haq ùh i ka tuiq cleq .³⁷ Mahaq tàng mangai aih khoe qnac ta manoh blinh ùh yóc mai majah qmang aih haq blêq ðeh chac ,qnah hòm haq hèm hêq oe mòeq ngai raq bri ùh yóc mai ðeh ma khoe têu bàu , haq aih broq troq .³⁸ Mangai ma yóc mai aih broq troq mahaq mangai ma ùh yóc mai aih broq yeo troq hòm .

³⁹ Óng oe rih pang leq ,cadri haq ep tiaq ðeh óng pang aih , tàng óng cachit , cadri haq pi tawac cleq , waq toq hatroq ka manoh Chuaq ,haq enh yóc cabò ùh loe .⁴⁰ Mahaq ,tiaq manoh da au , tàng jah haq oe qmang aih raq yeo hlàu . Au loq jò au anoe qmang kô , ta au i Yiang Hadròeh da Boc Plinh.

8

Tadreo kan kiac

¹ Ta hatùang trùh ngè tadreo kan kiac , bèn loq ðeh kô diq mangai loq . Mahaq kan loq aih broq ka mangai loq ðèch hnhè rađeh , yàng da kan loq waq aih ma broq dua lem .² Tàng i cabò doe ðeh kô mangai loq , joq qnàng mangai aih qnhòq loq qmang ka rađeh khòh loq .³ Mahaq tàng i mangai leq loq waq ka Boc Plinh ,Boc Plinh loq ka mangai aih .⁴ Qmang aih, anoe trùh trong acaq ngè khoe tadreo ka kiac qmù , bèn loq kiac qmù ta crông taneh kô aih ðech do , i toq Boc Plinh raq , enh gùng ka aih ùh i kiac leq hòm.⁵ Joq wì doe i bàc kiac ,qnah oe ta tróc qnah oe ta haqneq (aih iq dài wì majah tadreo bàc kiac)⁶ Da bèn ma loq ,i mòeq Boc Plinh raq , aih Baq bèn , rìm yiniq loh diq enh haq , bèn diq rih ka haq , èh hòm i mòeq Chuaq raq, aih Chuaq Jesus Christ , rìm yiniq diq canòm ka haq men i, bèn hadai qmang aih .⁷ Mahaq ùh xài rìm ngai diq loq qmang aih . I qnah ngai oe raq hèm i kan kiac , dài jò wì acaq ngè tadreo , wì hèm aih la ngè tadreo ka kan kiac , jò aih cliac manoh wì haq loh ka pi ðràng , biac aih hi broq ka manoh wì haq loh ka amù .⁸ Mahaq , ùh xài ngè acaq broq bèn jah aih lem ka manoh Boc Plinh , tàng bèn acaq dua ùh jah cleq ,ùh acaq dua ùh hnhung cleq .⁹ Rabiaq haq oq , apaq òeđeq kan loq da bèn broq ka mangai ùh nèn catoeh ataq.

¹⁰ Majah qmang aih ,mangai ma ùh nèn hnoq oh daq mangai ma i kan loq haqngui acaq ta

hnim tadreo kan kiac , aih wì ma ùh top dua acaq òh diq qmòh ? ¹¹ Aih ajoq ìh yòc òh kan loq ,broq raliang òh mangai ma ùh nèn , aih xài bài òh òh daq da Chuaq Jesus Christ ma khoe cachit am ka wì. ¹² Jò pì broq yiniq luiq òh ka òh daq qmang aih ,manoh wì haq khoe ùh nèn loh tam ka habau, aih pì khoe broq yiniq lui ka Christ . ¹³ Dài haq, tàng joq ngè acaq broq ka òh daq au tacro , blin au ùh acaq jam , òh daq au ùh hiaq broq nen ka òh daq catoeh cro .

9

Cwìang da Phaulo

¹ Au ma ùh i cwìang cleq qmòh ? Au ma ùh xài mangai Tiaq cla ? Au qnhòq lah hnoq Jesus Chuaq bèn ùh xài ? Òh daq ma ùh xài yiniq broq da au enh dalam ka Chuaq qmòh ? ² Patiah òh haq ,tàng joq au ùh broq mangai Tiaq cla am ka wì qnoeq, dua au broq mangai Tiaq cla am ka òh daq , majaan qmang aih òh daq raq teo abroq da au enh dalam ka Chuaq . ³ Aih bàu au capoch cwaii ka raðeh enh ngèa mangai enh tah hadrah ka au . ⁴ Nhèn ma ùh i ka cwìang acaq ôq? ⁵ Nhèn ma ùh khòh qnong mòeq ngai gucadri broq mai hu lam ti nhèn qmang ka bài mangai Tiaq cla qnoeq , qmang ka wì òh daq ta Chuaq ,qmang ka Sêpha khoe broq loq ùh xài ? ⁶ Ahiaq toq ma Banaba raq ma ep abroq hu jah acaq ? Alah i bô acaq pua enh hnim cla hu broq linh lam tajêh ? Alah i cabô pit wuàn nho mahaq ùh jah git pli. Alah i cabô ban bài mahaq ùh yòc diac tôh haq hu ban raðeh . ⁸ Au anoe qmang aih, aih troeq wì ma loq capoch yôt ùh xài ? Hset Ranenh ma ùh anoe qmang aih ? ⁹ Majah qmang aih ta Ranenh Môise i achih “ Ìh apaq srôp mong òh qnang len qmau” . Boc Plinh nhet ka òh xài ? ¹⁰ Haq anoe bàu aih waq ka bèn loq ùh xài ? Joq ! qmang ka ma khoe achih ka bèn rameh

“ Mangai abèq rùang ep jah tangèh men kai ,

mangai len qmau , ngèh ka jah òh diq men len ”.

¹¹ Tàng nhèn khoe rai ka òh daq adrech trong mahua yiang, nhèn gat hlài dahwèq enh pì ,aih i cleq ma ùh troq ? ¹² Mangai qnoeq khòh broq qmang aih enh qnhèq ka òh daq ,loq ka nhèn ?Hnoq anoe qmang aih,nhèn ùh yòc cwìang kô , cla nhèn raq chiuq xalep rìm trong , òh daq ùh hiaq i cleq khech tât Bàu lem da Christ ¹³ Òh daq ma ùh qnì , cabô patih ta hnim kùh waiq ,aih haq acaq ramèh wì ma òh ta hnim kùh waiq qmòh ? cabô patih ajang prang tadreo, aih ajoq haq wiang jah axong enh aih qmòh ? ¹⁴ Hadai qmang aih,Chuaq i doe “Mangai leq hnài Bàu lem , aih haq jah ban raðeh xi Bàu lem”. ¹⁵ Mahaq au qnhòh lah yòc cwìang aih hu thê òh daq , au achih jàiq kô ùh xài òh daq taboe bòch cwìang aih , kô raq nen au hu jah catèh raðeh , au chiuq cahit kan au ùh òh daq ka cabô blah yòc da au. ¹⁶ Majah qmang aih, jò au lam anoe Bàu lem, au ùh i ka nen ajang leq òh daq hu catèh. Aih raq yiniq au au ep broq , tàng ùh anoe hnài Bàu lem aih majoq kan habo ka au . ¹⁷ Tàng joq au lem bùi ka broq biac aih , aih èh au jah waq baha , tàng joq au ùh enh broq ,biac aih aih dua khoe jao ka au . ¹⁸ Aih èh au jah baha cleq ? Qmang kô ! Au ùh yòc cwìang au ma khoe i qmang ka mangai qnoeq ma hnài Bàu lem,mahaq jò au anoe hnài Bàu lem, au anoe qmòe dech ùh yòc baha . ¹⁹ Au ùh tawac, ùh hiaq ep broq tiaq bàu cabô , mahaq au khoe broq raðeh wia hapông rìm ngai , òh daq hu jah tam yeo bàc ngai . ²⁰ Oe ti mangai Juda ,au tiah ka mangai Juda , waq ka jah mangai Juda , ti mangai enh qneq ka ranenh ,(hiloq ka au ùh oe enh qneq ka ranenh) au hadai tiah ka mangai enh qneq ka ranenh, òh daq au hujah mangai enh qneq ka ranenh , ²¹ Oe ti mangai ùh i ranenh

,(Yac ka enh ngèa Boc Plinh au ùh xài mangai enh qneq ka cwiàng da nenh ,majah qmang aih au oe enh qneq ka ranenh da Christ), mahaq au hadai oe tiah ka mangai ùh i tiaq ranenh ,đòeq hu jah mangai ùh tiaq ranenh . ²² Oe ti mangai ùh nèn , au hadai ùh nèn ,đòeq hujah mangai ùh nèn , au khoe wia rìm trong am ka rìm ngai , đòeq hujah dèch yac ka toq biah ngai, broq qmang leq dua au lènh . ²³ Au broq rìm yiniq kô aih diq broq ka Bàu Lem , đòeq au hadai wiang jah ta axong xôq ramot ta aih .

²⁴ Oh daq ma ùh loq , tanòe wì tacadâu cadêh, diq ka wì hadai cadâu , mahaq moeq ngai raq majah waq baha qmòh ? Qmang aih ,oh daq cadâu qmang leq đòeq hujah waq baha oq. ²⁵ Dìq ka mangai tacadâu cadêh aih , wì haq dênh ka rađeh bacc trong , wì broq qmang aih đòeq jah kui cadoh riang loq om . Mahaq da bèn đòeq hujah kui cadoh riang ùh jò leq om . ²⁶ Aih iq ,dài au ùh cadâu taliq , au jêh ùh xài au jêh cayeo. ²⁷ mahaq au tabroq dèh ka chac cla au ùh palap cleq , thê haq broq hapông au , ùh qmang aih broq braiq atiq ka jò au hnài wì qnoeq , yàng eh cla au aih cadac rađeh qmòh.

10

Ngan dua enh Isorali

¹ Majah qmang aih , au ùh enh dōq ka oh daq ùh qnì kan cadraq bèn diq khoe oe enh qneq ka yùc , diq ka wì khoe lam pagat ka diac raxiq. ² đòeq Môise broq baptem ka wì haq enh dalam ka yùc xam enh qneq ka diac raxiq . ³ diq ka wì khoe acaq dahwèq yiang ,⁴ rai ôq diac yiang , majah qmang aih wì haq ôq enh nòe hmo yiang ma tiaq wì haq , hmo aih aih raq Christ ⁵ Mahaq taqne wì haq ja ka mangai ùh lem manoh Boc Plinh , dài bacc ngai wì haq majah khoe tacro cachit tanòe braih kàn . ⁶ Bòe yiniq kô khoe loh qmang aih , đòeq broq dua hu hnài bèn , dōq bèn ùh hiaq ònh tiaq trong dù qmang ka wì aih khoe broq . ⁷ Èh hadai pi dùh kùh waiq radua qmù kiac qmang ka wì aih hòm , tiah ka bàu khoe achih “ Wì haqngui acaq ôq , khoe aih padinh yòng pagôq racaih ”. ⁸ Bèn apaq ti taqnong tango qmang ka wì aih ma khoe broq , taiq aih raq mòeq hì majah i baiq jàt piq mùan mangai cachit . ⁹ Bèn hadai apaq qnhro Christ qmang ka wì ma khoe qnhro , taiq aih raq wì haq majah cachit ka bìh kap . ¹⁰ Èh hadai apaq mamùc tiah ka wì khoe mamùc , taiq aih raq wì haq majah ep cachit enh ti kōng bình plinh palùng ¹¹ Bài yiniq kô khoe loh ka wì qmang aih đòeq broq dua am ka bèn , khoe achih hlài đòeq hu pariaq bèn aih bài mangai ma rih ta bài qnhòng atiq pulùch ¹² Qmang aih , cabô loq xoh rađeh kô yòng cajap, rabiaq haq oq loq tacro . ¹³ Bài kan padô qnùt trùh ka oh daq ,ùh i ka yiniq leq ma yi dōch ka padren kon mangai . Boc Plinh ùh tablòq manoh , haq ùh dōq ka oh daq glàm kan padô qnùt yeo loe ka padren oh daq , mahaq ta kan padô aih haq pèch trong ka oh daq hu jah loh , đòeq oh daq hlât dràng.

¹⁴ Qmang aih oh daq da au , drah wia ka hangai trong kùh waiq radua qmù . ¹⁵ Au anoe ka oh daq aih au anoe ka bài mangai i manoh rabiaq , pi boq bàu au anoe kô : ¹⁶ Chrōng xôq ramot bèn manè apôi kô ma ùh xài khoe pajùm ti mahim da Christ qmòh ? Bênh bèn ma goh kô aih ma ùh joq pajùm ka chac da Christ qmòh ? ¹⁷ Majah qmang aih diq deh mòeq toq bênh raq , dài bèn yac ka bacc ngai dua mòeq chac raq majah qmang aih bèn diq pajùm ta mòeq toq bênh raq . ¹⁸ Ngan mangai Isorali beq ! Bài mangai acaq jam tadreo aih ma ùh alùh pajùm ti prang tadreo qmòh ? ¹⁹ Au anoe qmang aih au anoe cleq? Dahwèq ma dèch tadreo am ka

qmù kiac aih i loh ranenh cleq , radua qmù kiac aih i loh cleq ùh ? ²⁰ Blinh ka ùh , mahaq dahwèq mangai enh gùng tadreo aih wì tadreo ka kiac chõc , ma xài wì tadreo ka Boc Plinh . Qmang aih au ùh enh oh daq wiang taqmùt ti kiac chõc . ²¹ Oh daq ùh jah ôq doe chrõng da Chuaq khoe aih ôq doe chrõng da kan kiac , oh daq ùh jah acaq pajùm aniang ti Chuaq rai pajùm aniang ti kan kiac . ²² Ahiaq bèn enh broq ka Chuaq tarènh ? Bèn ma yeo dèh ka haq ?

²³ Pì doe “Rim yiniq au diq khòh broq”, mahaq ùh xài rim yiniq diq i lòeq, “ Rim yiniq au diq khòh broq” mahaq ùh xài rim yiniq diq broq dua lem . ²⁴ Apa q i cabô hèm jah toq ka rađeh , mahaq mangai leq mangai meh hadai ep hèm ka mangai qnoeq diq . ²⁵ Rim dahwèq atech tanoe tech jam , diq khòh rot acaq dõng ,apaq tàng đeh yùq ta manoh đòeq bõch đeh , ²⁶ Majah qmang aih , crõng taneh kô xam rim yiniq ta aih diq da Chuaq . ²⁷ Tàng loq i mangai ùh lùl akhen ka oh daq , oh daq enh lam , aih yac ka wì padon qnoh cleq ,oh daq acaq cameh , apaq tàng đeh yùq ta manoh đòeq hu bõch đeh . ²⁸ Mahaq tàng i mangai doe ka oh daq “ Ma kô khoe tadreo” , aih apaq acaq , đòeq lem ka manoh cla oh daq xam mangai ma khoe doe ka oh daq , ²⁹ Au ùh anoe trùh manoh oh daq ,mahaq anoe trùh manoh mangai tau . Wia ka trong au loq đeh khòh broq mahaq dõq ka manoh mangai qnoeq ep hadrah ata q ? ³⁰ Tàng khoe manè apôi au men acaq , aih jì lai q dãng mòeq nà acaq au ma dõq ka wì qnoeq cwò ka rađeh? ³¹ Qmang aih ,oh daq yac ka acaq , yac ka ôq ,yac ka broq cleq , diq broq đòeq Boc Plinh jah ranhòm . ³² Apa q roh ka cabô kan catoeh ,yac ka mangai Juda ,mangai Gorec , yac ka Tagop Hadròh da Boc Plinh . ³³ drah qmang ka au kô , àu broq rim trong dõq jah lem ka manoh bacc ngai , ùh chaq trong lem toq ka cla rađeh mahaq chaq trong lem am ka mangai qnoeq , đòeq wì haq hadai jah dèch .

11 ...

Tanòe Tagop Hadròh

¹ Drah tiaq dua au , qmang ka cla au tiaq dua Christ . ² Au manè oh daq loq hmàng ka au rim trong , loq wèq bàu au ma khoe hnài oh daq . ³ Mahaq au enh oh daq loq Christ aih gàu da rim ngai gucalô , mangai gucalô aih gàu da mangai cadri , Boc Plinh aih gàu da Chirst . ⁴ Rìm ngai guca lô yac ka wì haq waiq khàn , yac ka capoch bàu pajàu tàng wì haq paclùm dèh gàu , aih wì haq baxep dèh gàu . ⁵ mahaq mangai gucadri yac ka haq waiq khàn ,yac ka haq capoch bàu pajàu , tàng haq ùh yõc mù paclùm dèh gàu , aih haq baxep dèh gàu : ùh i crài cleq ka haq khoe got gàu ta nguah . ⁶ Tàng mangai gucadri ùh yõc mù paclùm dèh gàu , aih drah got ta nguah dõng beq . mahaq tàng gucadri hnoq got xác gàu aih loq camaih , aih ep bac lùm gàu . ⁷ Mangai gucalô ùh dũh yõc mù paclùm gàu majah qmang aih , haq aih qmù da Boc Plinh , kan ranhòm da Boc Plinh . ⁸ Majah qmang aih gucalô ùh loh enh gucadri , mahaq gucadri ma loh enh gucalô . ⁹ Èh hadai ùh xài taiq gucadri majah broq loh gucalô , mahaq gucadri aih ka gucalô . ¹⁰ Aih iq , taiq bõc bình plinh , dài haq gucadri majah ep waq ka i teo tagàu đòeq hu hadro cwiang rađeh ma canòm . ¹¹ Mahaq enh dalam ka Chuaq , gucadri ùh xài enh gùng ka gucalô , gucalô ùh xài enh gùng ka gucadri . ¹² Qmang ka gucadri khoe loh enh gucalô , aih gucalô hadai hauang loh enh gucadri , diq baiq loh enh Boc Plinh . ¹³ Cla pì oh daq boq qmang kô beq : Gucadri waiq khàn ka Boc Plinh mahaq ùh waq yõc mù bac lùm gàu aih atroq ? ¹⁴ Ùh xài bèn khoe loq đeh : Tàng mangai gucalô rong xác yõh aih ajoq kan camaih? . ¹⁵ Mahaq , tàng mangai gucadri rong xác yõh aih ma ùh xài kan ranhòm da haq? Majah qmang aih khoe am ka haq xác yõh ,bu dãng mù clùm gàu diq.

¹⁶ Tàng loq i cabô tarahen trong kô, nhên ùh hmaq qmang aih ,Tagop Hadròeh da Boc Plinh hadai ùh hmaq qmang aih .

Broq ramènh acaq Pua Hadròeh .

¹⁷ Au anoe ka oh daq bàu kô, ùh xài òeq manè oh daq ,majah qmang aih jò oh daq tagop ti dabau ,ùh i lòm broq ka pì yeo lem tam mahaq kiang broq ka pì yeo hamoq tam . ¹⁸ Angoe aih,au i tàng jò oh daq Tagop , i kan loq ti lah đac dabau , au đi broq ka lùì bàu aih . ¹⁹ Majah qmang aih , taqne oh daq hi loq ka i kan loq ti lah đac dabau , aih òeq hu canau ka mangai leq ma joq qnàng điq ka manoh . ²⁰ Aih iq ,jò oh daq tagop oe mòeq nòe ti dabau , aih pì oe xài acaq Pua Hadròeh da Chuaq hòem . ²¹ Majah qmang aih , jò haqngui acaq mangai dahuiq acaq dèh hra , qnah ngai pangot đeh ,qnah ngai panàc loh ka bù bia. ²² Oh daq ma ùh i dèh hnim hu acaq ? Ahiaq pì dù đac Tagop Hadròeh Boc Plinh, enh broq ka mangai ma ùh i đeh ep camaih ka rađeh ? Au anoe ka pì qmang leq kô ? Au i khòh manè pì loq ùh? Trong kô joq au ùh lòm manè oh daq ! ²³ Majah qmang aih au khoe jah enh Chuaq trong au ma hnài oh daq : Chuaq Jesus mang wì ma blòq đac haq ,yòc bèn , ²⁴ jò haq khoe manè apôi , haq goh bèn aih rai doe “ Kô chac au , chac ma khoe am ka pì , broq qmang kô òeq hu hmàng trùh au” ²⁵ Hadai qmang aih ,khoe ka acaq đi xèq , Haq dèch doe chròng rai doe “Chròng kô aih tajao maneo oe ta ma him au , jò pì ôq broq qmang kô òeq hu hmàng trùh au . ²⁶ aih iq jò leq oh daq acaq bèn kô ,ôq doe chròng kô ,pì anoe kan cachit da Chuaq trùh hloe hi haq wih hlài. ²⁷ Qmang aih mangai leq ùh taji ka acaq bèn ùh taji ka ôq chròng da Chuaq , aih èh haq ep pòq yiniq lui ka chac ka ma him Chuaq .²⁸ Aih iq rìm ngai majah ep ngan hlài rađeh adroe ka acaq bèn kô, ôq chròng kô , ²⁹ Majah qmang aih ,mangai leq pì qnì canau ka chac Chuaq mahaq dua acaq bèn rai ôq chròng aih , aih haq acaq ôq kan hadrah ka rađeh . ³⁰ Aih raq , dài taqne oh daq majah i bəc ngai ùh hróc yiniq , xam bəc ngai cachit . ³¹ Mahaq tàng bèn loq tiboq hlài rađeh ,aih bèn khoe ùh ep pòq kan hadrah . ³² Mahaq jò Chuaq hadrah bèn , aih haq bắt bèn , òeq bèn ùh hiaq pòq yiniq lui pajùm ka mangai ta cròng taneh kô . ³³ Qmang aih , oh daq da au jò pì tagop dabau hu acaq pajùm , ep gòm dabau . ³⁴ Tàng i cabô pangot ,aih haq chòn acaq dèh ta hnim ,đòq oh daq ùh hiaq tagop dabau òeq hu pòq wê kan hadrah . Yiniq qnoeq èh, jò au trùh au hi taqmroq hlài

12

Kan tabòeh da Yiang Hadroeh

¹ Manòeq kô , au ùh enh ka oh daq ùh qnì qmòe cleq ajang kan tabàih yiang . ² Oh daq loq jò bèn oe raq mangai enh gùng , yac ka trong leq điq khoe tui tiaq radua qmù lâu , mac maiq ka wì enh qnong taleq tameh. ³ Aih raq dài au majah anoe ka oh daq , ùh i cabô i Yiang Hadròeh Boc Plinh ma ti doe : “ Chua Jesus troq ka ra-òh , hamaq ” .Tàng joq ùh i ka Yiang Hadròeh hadai ùh i cabô doe ka Jesus aih Chuaq . ⁴ I bəc kan tabàih crài ka dabau , mahaq dua mòeq Yiang Hadroeh raq. ⁵ I bəc yiniq patih crài ka dabau , mahaq hadai mòeq Chuaq raq. ⁶ I bəc trong abroq crài ka dabau , mahaq dua mòeq Boc Plinh , aih raq Mangai broq rim yiniq oe enh dalam ka rim ngai . ⁷ Yiang Hadròeh patô am enh dalam rim ngai , òeq mangai leq mangai meh hadai jah lòeq pajùm. ⁸ Mangai kô canòm ka Yiang Hadròeh haq jah màiq bàu rabiaq , mangai meh hadai canòm ka Yiang Hadròeh aih jah màiq bàu capoch i kan loq . ⁹ Enh Yiang Hadròeh ,mangai kô jah manoh lùì , hadai enh Yiang Hadròeh aih mangai tau jah màiq broq brêh ka mangai yiniq . ¹⁰ Qnah ngai jah màiq broq kan halac , qnah ngai jah capoch bàu pajàu ,qnah ngai loq hadro bài

Commented [WU1]:

kiac , qnah ngai jah tapoch bài bầu craq crài ka dabau , qnah ngai jah màiq loq anoe hlài bầu aih .
¹¹ Bài yiniq aih diq loh enh mòeq Yiang Hadròeh ,tiaq dèh manoh haq enh lah axong am ka tang ngai .

Chac da Christ

¹² Tiah ka chac aih mòeq raq , mahaq i bàc hamenh , tiah ka hamenh ta chac yac ka bàc mahaq dua wia pajùm mòeq chac raq. Christ i crài cleq qmang aih .¹³ Majah qmang aih bèn yac ka mangai Juda , yac ka mangai Gorec ,yac ka mangai broq hapông , yac ka mangai broq dic cabô , diq khoe baptem pajùm ta mòeq Yiang Hadròeh òeq wia mòeq chac raq, èh hòm bèn diq hadai khoe ôq pajùm mòeq Yiang Hadròeh .¹⁴ Chac hadai ùh xài i palap mòeq hamenh ,mahaq bàc hamenh.¹⁵ Tàng jènh doe “ Au ùh xài ti dài au majah ùh i pajùm cleq ka chac” ,ma xài taiq nen aih haq ma ùh hatop ka chac.¹⁶ Tàng don doe “ Au ùh xài mat , dài au ùh wiang pajùm cleq ta chac” , ma xài taiq nen aih haq mangai pi pajùm ta chac.¹⁷ Tàng chac aih diq mat đồng , aih èh bèn tàng xi cleq ? Tàng diq ta chac aih toq don , aih èh bèn xua xi cleq ?¹⁸ Mahaq manòeq kô Boc Plinh khoe taqmroq bài hamenh ta chac bèn, am mòeq yiniq oe dèh mòeq nòe , qmang ka cla haq hnoq dèh lem tiaq manoh haq khoe di .¹⁹ Tàng mòeq hamenh raq aih èh chac oe ajang leq?²⁰ Qmang aih yac ka bàc hamenh mahaq dua mòeq chac raq.²¹ Mat ùh khòh doe ka capiang ti “ Au ùh i ep cleq ka gè” .Gàu ùh khòh doe ka jènh “ Au ùh i ep cleq ka pi” .²² Majoq qnàng aih , yiniq cleq ta chac bèn hnoq haq ma yeo ùh nèn dèh , ma aih raq ma yeo khòh nhet²³ Ta chac bèn hamenh leq bèn hèm haq ma yi ùh cra , ma aih raq bèn ma yeo khòh ngan , maleq ma ùh lem , ma aih raq bèn ma palàng .²⁴ Maleq ma khoe lem , ma aih ma oe ep palauq cadèh . Mahaq Boc Plinh ma khoe taqmroq ta chac mangai bèn, hamenh leq ma yi hamoq aih òeq haq jah caqmùh caqmàm .²⁵ òeq ta chac ùh hiaq i kan talah òac ka dabau , mahaq maleq ma meh loq wiang hèm ka dabau .²⁶ I maleq ta chac bèn ma jìq , aih ma qnoeq hadai wiang jìq, maleq majah caqmùh caqmàm aih èh maqnoeq hadai wiang lem bùi.

²⁷ Manòeq kô , oh òac aih raq chac da Christ , oh òac aih la hamenh ta chac , mangai leq mangai meh i dèh hra nòe .²⁸ Boc Plinh khoe broq ta Tagop Hadròeh , adroe aih mangai Tiaq cla , atiq aih mangai pajàu , khoe aih mangai hnài , tia aih mangai broq kan halac , èh hòm mangai i màiq broq brèh ka mangai yiniq, mangai loq hanò , mangai òeq ti ranenh , mangai capoch bài bầu craq crài .²⁹ Rìm ngai aih diq mangai tiaq cla đồng qmòh ? Rìm ngai aih diq pajàu đồng qmòh? Rìm ngai aih diq mangai hnài đồng qmòh ? Rìm ngai diq broq kan halac đồng qmòh?³⁰ Rìm ngai diq i màiq broq brèh kamangai yiniq qmòh ? Rìm ngai diq capoch bầu halac qmòh ? Rìm ngai diq loq anoe hlài bầu halac aih doe cleq qmòh ?

³¹ Drah tangèh òeq jah kan tabàih ma yi kàn đồng . Manòeq kô èh, au padon patô ka oh òac trong ma yeo lem hòm.

13.....

Kan loq waq ...

¹ Yac ka au loq tapoch diq đồng ka bầu kon mangai xam bầu bình plinh , mahaq ùh i kan loq waq , aih au bu dàng chỉnh ja atèh . , qmang ka hatùq gổc lòe bầu² Yac ka au i màiq loq capoch pajàu , yac ka loq diq đồng ka kan hlèp ,loq diq kan rabiaq , yac ka au i manoh lùì jah qnhac hloe bùi wang , mahaq ùh ka kan loq waq , aih dua au ùh loh cleq.³ Yac ka au axong đồng dèh kùng hang òeq hu ban mangai pa , yac ka chac cla au òq hloe wì bùi, mahaq tàng ùh i kan loq waq , bài yiniq aih dua ùh i broq ka au jah lòeq cleq .⁴ Kan loq waq loq òrang àt, kan loq waq loq hanò , kan loq waq ùh tajènh , ùh catèh raðeh ,⁵ ùh broq trong ùh troq , ùh chaq jah lòeq toq ka raðeh ùh rênh nòeh , ùh hèm qmèq ka cabô ,⁶ ùh bùi ka trong ùh taq ateq , mahaq bùi ta trong joq

qnàng . ⁷ Kan loq waq loq grom gri rìm trong , lùì rìm trong , loq tangèh rìm trong , loq àt rìm trong .

⁸ Kan loq waq ùh jò leq hnhung lùch , Bàu pajàu èh diq , biac am màiq tapoch bàu halac èh lùch , kan rabiaq loq èh hadai pi i . ⁹ Majah qmang aih kan loq da bèn qnhòq gèh geo , capoch pajàu dua qnhòq gèh geo . ¹⁰ Mahaq jò kan gèh geo hi trùh , jò aih èh bài yiniq leq ma qnhòq gèh geo hi cadac . ¹¹ Jò au oe raq kon qyoh , au tapoch tiah ka wì qyoh , manoh hèm tiah ka wì qyoh , boq ngan tiah ka wì qyoh , jò au khoe wìa mangai kàn , au hi cadac bài trong da wì qyoh . ¹² Manòeq kô tiah ka bèn ngan ta guàng , hnoq bu badrèh badrah , trùh hi bèn hi jah hnoq baiq hadrò tangèa ti dabau , hi kô au loq qnhòq jàp . Trùh jò aih èh , au hi jah loq qmang ka Chuaq khoe loq ka au .

¹³ Dài haq manòeq oe i piq yiniq kô : Manoh lùì , kan tangèh , kan loq waq , mahaq oe ta piq yiniq aih , kan loq waq aih ma yeo kàn dõng .

14....

Capoch pajàu sam bàu halac

¹ Drah ti tiaq chaq kan loq waq . Hadai drah tangèh ka bài kan tabàih enh Yiang , ta aih màiq capoch pajàu aih joq yeo nhet . ² majah qmang aih cabô capoch bàu halac , aih ùh xài haq capoch ka kon mangai mahaq haq capoch ka Boc Plinh , ma joq qnàng aih ùh i cabô qnì tàng (majah qmang aih enh dalam ka Yiang mangai aih capoch bàu hlèp) ³ Da mangai capoch pajàu aih haq capoch ka kon mangai òeq broq wì jah ka cajap , hu pariaq rai ti alòng . ⁴ Mangai capoch bàu halac , aih haq broq ka cla rađeh jah cajap , yàng da mangai capoch pajàu aih haq paqnhrang Tagop Hadrèh . ⁵ Au ngèh ka oh daq diq capoch bàu halac , mahaq au ma yeo ngèh aih oh daq capoch pajàu . Mangai capoch pajàu aih yeo kàn ka mangai capoch bàu halac mahaq ùh i ka cabô anoe hlài dõq Tagop Hadrèh jah loq tàng òeq hu jah qnhrang . ⁶ Manòeq kô , diq ka oh daq , tàng joq au trùh ti oh daq , au capoch bài bàu halac , mahaq bàu aih ùh i paqnoh am ka oh daq loq kan hlèp , ùh i kan rabiaq , ùh i bàu pajàu , ùh i hnài oh daq loq qmòe cleq , aih ajah cleq ka oh daq ? ⁷ Yac ka ranac croh pi i kan rìh mahaq loh atèh qmang ka taliaq , qmang ka broc , tàng ùh i bàu ma crài ka dabau òeq hu hadro aih broq qmang leq ma canau ka taliaq hlui cleq , broc rawèh cleq ? ⁸ Tàng ken hlui ma nhài aih èh cabô ma hu padon lam tajèh ? ⁹ Oh daq hanoh qmang aih , tàng joq ùh yõc rapet tapoch ma hloh dõq wì tàng , broq qmang leq wì maloq oh daq anoe cleq ? aih oh daq capoch ka cayeo . ¹⁰ Oe crõng taneh i bacc bàu capoch , ùh i bàu leq ma ùh i ka ranenh . ¹¹ Qmang aih , tàng au ùh qnì tàng qmòe ranenh bàu mangai ma qnang anoe , ajoq mangai aih ngan au budàng mangai diac wì , au hanoh hnoq haq qmang ka mangai diac wì diq . ¹² Qmang aih oh daq drah ngèh drah ti chaq bài kan tabàih da Yiang Hadrèh . Chaq ma yeo bacc òeq hu paqnhrang Tagop Hadrèh . ¹³ Dài aih , mangai capoch bàu halac , drah waiq khàn òeq hu jah anoe hlài dõq wì loq bàu aih . ¹⁴ Majah qmang aih , tàng au waiq khàn xi bàu halac , aih yiang da au waiq khàn mahaq gàu ngoc au ùh qnì cleq . ¹⁵ aih èh au broq qmang leq ? Au waiq khàn tiaq yiang , mahaq au hanoh waiq khàn tiaq gàu ngoc . Au calêu tiaq yiang , mahaq hadai calêu tiaq gàu ngoc . ¹⁶ Ùh qmang aih , tàng ìh toq manè apôi tiaq yiang , èh mangai ma ùh qnì haq haqngui tamàng , ùh qnì ìh capoch cleq , broq qmang leq haq maloq tiaq bàu manè aih òeq hu doe “Amen” ? ¹⁷ Hi loq ka bàu manè apôi da ìh aih joq lem , mahaq mangai qnoeq ùh jah canòm ka bàu aih òeq hujah qnhrang ðeh diq . ¹⁸ Au manè apôi Boc Plinh , au khoe jah capoch

bàu halac yeo bacc đồng ka pì oh daq , ¹⁹ mahaq oe ta hnim Tagop Hadròeh , au enh yǒc padam nà bàu ma loq tàng ðòeq hu jah hnài mangai qnoeq aih yeo hnau ka yǒc mòeq mùan bàu halac .²⁰ Pì oh daq pì ùh hèm tiah ka manoh kon qyoh hòm . mahaq trong dù aih ma khòh tiah ka kon qyoh . Trong rabiaq loq drah tiah ka mangai khoe gēh mangai . ²¹ Ta hset ranenh i achih : Chuaq doe

“ Au canòm ka mangai capoch bàu halac xam hacùng bàu mangai diac wì ,

ðòeq hu tapoch ka bài mangai kô .

Mahaq qmang aih dua wì ùh tamàng au” .

²² Qmang aih , bài bàu capoch aih teo , ùh xài ka mangai lùl mahaq ðòeq ka mangai ma ùh lùl Chuaq . Yàng da bàu pajàu aih teo , ùh xài ka mangai ùh lùl , mahaq ðòeq ka mangai lùl Chuaq.

²³ Qmang aih jò Tagop Hadròeh tagop ti dabau , tàng rìm mangai tapoch ðeh hra bàu halac , yàng i mangai ùh qnì ðeh cleq , òh i mangai ùh lùl Chuaq mùt ðìq , aih wì ma ùh hiaq doe ka pì ranhua qmòh ? ²⁴ Mahaq tàng i mangai ùh lùl Chuaq i mangai ùh qnì cleq mùt , wì tàng rìm ngai pì qnang tapoch bàu pajàu , bàu aih tabroq ta manoh , bàu aih hadrah ka wì haq , ²⁵ bòe kan hlèp ta manoh wì haq khoe jah paqnoh loh , aih òh wì ma ùh bla-op ðeh hadrò ta taneh ðòeq kùh waiq Boc Plinh , rai doe : Joq qnàng i Boc Plinh oe taqne oh daq !.

jò kùh waiq

²⁶ Atiq ka aih bèn anoe qmang leq hòm oh daq ? Jò oh daq tagop ti dabau , enh dalam pì , tàng mangai leq i bài calêu hadròeh , i bàu hnài , i kan mahnu , tàng i mangai tapoch bàu halac , tàng loq i mangai anoe hlài bàu aih . Rìm yiniq aih ep broq ma gēh đồng ðòeq rìm ngai ðìq jah paqnhrang . ²⁷ Tàng loq i mangai tapoch bàu halac , aih baiq piq ngai tapoch raq hēq , mahaq ep tagòm dabau , ep waq ka i mangai anoe hlài . ²⁸ Tàng ùh i ka mangai anoe hlài , mangai aih ep oe hatinh ta hnim Tagop , cla tapoch ðeh ka cla xam ka Boc Plinh . ²⁹ Mangai capoch bàu pajàu hadai palap baiq piq ngai raq hēq , mangai qnoeq hèm rai boq ka bàu aih . ³⁰ Mahaq tàng i mangai leq qnang hangui ta aih hnoq kan mahnu , aih òh mangai ma adroe ep hatinh . ³¹ Majah qmang aih ðìq ka oh daq khoe ka maleq trùh maleq ðìq jah capoch bàu pajàu , ðòeq rìm ngai jah hōc jah alòng . ³² Yiang da pajàu iu tiaq mangai pajàu . ³³ Majah qmang aih Boc Plinh aih ùh xài Boc Plinh da kan manhài , mahaq Boc Plinh da kan catèm . Drah broq tiah ðìq ka bài Tagop Hadròeh da mangai hadròeh . ³⁴ *Gucadrì ep oe ma hatinh ta hnim tagop , wì haq ùh jah capoch ta aih* , mahaq ep iu tiaq qmang ka bàu hset ranenh hnài . ³⁵ Tàng wì haq loq i yiniq enh bòch waq ka loq , wì haq ep bòch ðeh ông jò wì oe ta hnim , majah qmang aih gucadri capoch ta hnim tagop aih raq kan camaih . ³⁶ Ahiaq bàu Boc Plinh loh enh oh daq , tàng ùh meh haq trùh toq ta oh daq raq ùh xài ? ³⁷ Tàng loq i cabô hèm ðeh kô pajàu , ðeh kô jah kan loq enh Yiang Hadròeh sreò am , mangai aih khòh loq rameh : Rìm yiniq au achih ka pì kô ðìq bàu Boc Plinh thê . ³⁸ Tàng mangai leq ùh enh tamàng aih mac da wì haq !. ³⁹ Qmang aih , oh daq drah ngēh chaq màiq capoch bàu pajàu , òh hadai apaq tát trong capoch bàu halac . ⁴⁰ Mahaq rìm yiniq ep broq troq ðeh bè rai waq ka i atiq adroe .

15

Jesus Christ khoe rìh hlài....

¹ Manòeq kô , au enh bahmàng hlài ka oh daq Bàu lem au ma khoe hnài , oh daq ma khoe jah yǒc , ma khoe jah yòng cajap ta bàu aih . ² canòm ka bàu aih raq oh daq ma khoe jah ðeh , waq toq oh daq wēq wop qmang ka bàu au khoe hnài , tàng ùh qmang aih qngwan ka oh daq khoe lùl

³ Adroe ðìq đồng , au khoe hnài oh daq bàu cla au ma khoe jah , aih iq Christ khoe cachit ka

yiniq lui da bèn tiaq bàu Hset Hadròeh. ⁴ Wì khoe catùh haq, trùh hì piq, haq rih hlài tiaq bàu Hset Hadròeh. ⁵ Haq khoe mahnu rađeh dōq Sêpha hnoq, atiq ka aih haq am ka wì Mòeq jàt baiq ngai hnoq haq. ⁶ Khoe aih, ta mòeq yàng haq mahnu rađeh am ka loe padam hrinh ngai hnoq, ta aih bəc ngai manòeq kō oe rih, i bĩaq ngai khoe kùì. ⁷ Atiq ka aih haq mahnu rađeh am ka Jaco, khoe aih ka mangai tiaq cla haq. ⁸ Atiq dōng ka wì aih, haq hadai mahnu rađeh am ka au, bu diang am ka kon hin. ⁹ Majah qmang aih, taqne wì mangai tiaq cla, au kō joq yeo hamoq dōng, ùh ta jì ðòeq hu jah creο mangai tiaq cla, majah qmang aih au khoe ti tāt rùp baxa Tagop Hadròeh da Boc Plinh. ¹⁰ Yàng manòeq kō au jah qmang kō, aih diq canòm ka kan tabàih enh Boc Plinh, kan tabàih haq am ka au aih joq ùh hĩaq qngwan. Au patih yeo bəc dōng ka mangai qnoeq, ma joq qnàng ùh xài au mahaq kan tabàih da Boc Plinh khoe oe ti au. ¹¹ Qmang aih, yac ka nhèn, yac ka wì qnoeq, aih raq bài yiniq nhèn hnài, aih raq trong oh daq khoe lùì.

Kan rih hlài enh dalam ka Christ ...

¹² Tàng anoe hnài Christ khoe rih hlài enh kan cachit, meh hagleg taqne oh daq majah i qnah ngai doe mangai cachit ùh rih hlài? ¹³ Tàng mangai cachit ùh rih hlài, aih Christ hadai khoe ùh rih hlài. ¹⁴ Tàng joq Christ khoe ùh rih hlài, aih ajoq bàu nhèn hnài aih hi qngwan qngwaiq, èh manoh lùì da oh daq hadai qngwan diq. ¹⁵ Èh hòm, tàng joq qnàng mangai cachit ùh rih hlài, aih Boc Plinh khoe ùh broq ka Christ rih hlài, qmang aih nhèn khoe wiang capoch liq ka Boc Plinh jò nhèn doe haq khoe broq ka Christ rih hlài, lèh gèh haq nhèn capoch amòng ka Boc Plinh. ¹⁶ Majah qmang aih, tàng joq mangai cachit ùh rih hlài, aih Christ hadai khoe ùh rih hlài. ¹⁷ Èh hòm tàng joq Christ khoe ùh rih hlài, kan lùì da oh daq loh ka qngwan, oh daq oe raq deh ta kan yiniq lui cla. ¹⁸ Qmang aih, mangai ma kùì ta Christ hadai nhung lùch hloe mòeq ðòe. ¹⁹ Tàng joq bèn tangèh ka Christ qmòe toq ka qnhòng kō, aih ta crōng taneh kō joq diq toq bèn raq mangai ma yeo jiang ka ha-och ðeh.

²⁰ Mahaq manòeq kō, Christ khoe rih hlài enh mangai cachit, haq aih pli ramua da bài mangai ma kùì. ²¹ Majah qmang aih, taiq mòeq ngai majah i kan cachit, èh hadai taiq mòeq ngai majah hi i kan rih hlài da mangai cachit. ²² Tiah ka enh dalam ka Adam rìm ngai diq ep cachit, hadai qmang aih, enh dalam ka Christ rìm ngai èh diq jah rih hlài, ²³ mahaq rìm ngai ep tiaq ðeh atiq adroe: Christ aih pli ramua, hì haq ma hì trùh, bài mangai da haq hì rih hlài. ²⁴ Khoe aih èh kan lùch men trùh, jò haq ma hì ðèch diac am hlài da Baq aih Boc Plinh, atiq ka haq khoe raliang dōng bài diac padrōng kan, bài mangai i cwiang xam rìm padren, ²⁵ Majah qmang aih haq ep wèq cwiang trùh jò khoe roh dōng bài mangai ma tablêq ka haq enh caqnàm jènh haq. ²⁶ Mangai haq ma palùng ðac atiq dōng aih kan cachit, ²⁷ Majah qmang aih “Boc Plinh khoe ðòeq rìm yiniq enh caqnàm jènh haq”. Jò doe “rìm yiniq diq oe enh caqnàm haq”, aih khoe anoe ka hloh ta aih ùh xài i hloe xam cla Boc Plinh aih Mangai ma khoe ðòeq rìm yiniq diq enh qneq ka Christ. ²⁸ Jò rìm yiniq diq khoe iu haq, jò aih èh cla Kon hadai iu tiaq Mangai ma khoe ðòeq rìm yiniq diq oe enh qneq ka rađeh, dōq Boc Plinh broq rìm yiniq oe enh dalam rìm yiniq. ²⁹ Manòeq kō tàng joq ùh i kan rih hlài, mangai broq baptem thai ka mangai cachit wì ngèh cleq? joq mangai cachit ùh rih hlài hagleg wì ma broq baptem thai ka wì aih? ³⁰ Èh nhèn hadai qmang aih, hagleg nhèn jò leq dua toq tamua rađeh ta kan yat? ³¹ Wùih oh daq! au taqnòq ka kan cachit hì rìm hì, joq qnàng tiah ka au ma xan catèh ðeh pì oh daq enh dalam ka Jesus Christ aih Chuaq da bèn. ³² Tàng au tiaq dua kon mangai qnhòng kō ðòeq tajèh ka bài kiac dù ta gùng Êpheso, aih au khoe jah cleq? Tàng joq mangai cachit ùh rih hlài:

“Bèn chaq acaq beq, chaq ôq beq,
majah qmang aih hì da èh bèn hì cachit!”.

³³ Apa q dôq wì qnùt radeh : “ bài bua qmèq broq raliang manoh da mangai lem” . ³⁴ Drah hamang òòeq hu canau tiaq trong taq atôq , pì ùh broq yiniq lui hò m , majah qmang aih i mangai pì lòm qniq qmòe ka Boc Plinh , au anoe qmang aih dôq oh daq loq hèm ka camaih.

Chac da mangai rih hlài

³⁵ Mahaq i mangai ma doe : Mangai cachit aih rih hlài qmang leq ? yòc chac leq òòeq rih hlài ? ³⁶ Wùih mangai ma blùng tau , adrech pì ma rai , tàng joq haq ùh cachit adroe hòeq , aih haq majah hon ? ³⁷ Adrech pì ma rai aih ma xài chac ma hu wia ònh , aih bu dàng pliang adrech ,qmang ka pliang qmau , qmang ka pliang adrech qnoeq . ³⁸ Boc Plinh am ka haq chac hamac lem tiaq troq manoh cla Boc Plinh ma khoe òi dèh adroe , rì m pliang adrech òi q òi dèh hra chac hamac . ³⁹ Ùh xài xech akia leq òi q ta hatiah òng ka dabau , xech akia da mangai i dèh crài , xech akia da jam gùng i dèh crài , da chìm i dèh crài , ka hanoh i dèh crài . ⁴⁰ Èh i chac da òiac plinh , i chac da cròng taneh ,mahaq kan ranhòm chac hamac da òiac plinh ,da cròng tanheh crài ka dabau . ⁴¹ kan qngah da mahi crài , qngah da mat khè crài ,da halòng crài , qngah da halòng kô xam halòng qnoeq hadai crài ka dabau .

⁴² Kan rih hlài da mangai cachit hadai qmang aih . Chac hamac ma rai qnoh kô loq hech hnhung , mahaq hi rih hlài aih pì hech hnhung , ⁴³ jò ma rai qnoh aih rai ta kan xep , mahaq jò ma rih hlài aih ta kan ranhòm , jò ma rai qnoh aih hamoq ,mahaq jò rih hlài aih dèh. ⁴⁴ jò ma rai aih xech akia mahaq jò rih hlài aih chac yang .Tàng khoe i chac hamac xam xech akia , èh hanoh i chac hamac xam yang , ⁴⁵ Tiah ka bàu ma khoe achih :

“ Mangai ma adroe aih Adam khoe wia mangai rih i mahua rih ,
Adam ma atiq aih Mangai am kan rih” .

⁴⁶ Mahaq ùh xài chac hamac yang i adroe , mahaq chac xech akia adroe khoe aih chac hamac yang trùh atiq. ⁴⁷ Mangai adroe loh enh taneh aih da taneh , mangai ma atiq aih loh enh plinh . ⁴⁸ Mangai da taneh qmang leq aih èh bài mangai da taneh òi q hadai qmang aih òi q , mangai da plinh qmang leq ,aih èh bài mangai da plinh hadai qmang aih òi q . ⁴⁹ Qmang ka bèn khoe wè qmù dua kon mangai da taneh , aih èh bèn hadai jah wè qmù dua da kon mangai da plinh .

⁵⁰ Manòeq kô au doe ka pì oh daq : Xech akia xam mahim ùh jah mùt ta òiac Boc Plinh , kan loq hech hnhung ùh jah waq ka kan ùh qni hech hnhung . ⁵¹ Kô au paqnoh ka pì loq kan ma òi q jaq hlèp : òi q ka bèn kô èh ùh i kù òng , mahaq òi q òng ka bèn jah wih wia ma qnoeq. ⁵² Ta mòeq rahyàc raq , mòeq caqmlài mat , jò bàu ken ma atiq lùch . Majah qmang aih bàu ken jah hlui , mangai cachit hi rih hlài ,jah kan pì hiaq hech hnhung hò m , aih èh òi q ka bèn jah wih wia chac maneo . ⁵³ Majah qmang aih chac ma loq hech hnhung kô ep caxùnh yòc kan ùh hech hnhung , chac ma loq cachit kô ep caxùnh kan ùh qni cachit . ⁵⁴ Jò leq chac maloq hech hnhung jah caxùnh yòc kan ùh hech hnhung , chac loq cachit kô caxùnh yòc kan ùh cachit , aih èh jah xit qmang ka bàu Hset Hadròeh ma doe rameh : “ Kan blèq khoe lonh kan cachit” .

⁵⁵ “ Kan cachit ! aleq da gè kan blèq?

Aleq nòc da gè ?” .

⁵⁶ Nòc da kan cachit aih yiniq lui , kan dèh da yiniq lui aih ranenh . ⁵⁷ Mahaq manè apôi Boc Plinh khoe am ka bèn kan blèq enh dalam ka Chuaq Jesus Christ ,Chuaq da bèn . ⁵⁸ Qmang aih oh daq da au , yòng ma cajap haq , apaq dalàc , drah patih ka Chuaq ma bàc haq , majah qmang aih bèn loq kan xalep da pì oh daq enh dalam ka Chuaq aih ùh qngwan .

16

Tagop bac jèn

¹ Manòeq kô , anoe trùh trong tagop bac jèn òòeq yang am ka mangai hadròeh ma qnang nan , aih oh daq broq qmang ka au ma khoe anoe ka bài Tagop Hadròeh oe ta Galati . ² Oe ta hi gàu tuàng , rì m ngai oh daq tiaq òadeh bu hlàt tagop jah pang leq , òòeq qmòe dèh ta hnim raq , dôq

ùh hiaq ep gòm jò nhèn trùh men ti tagop ònh . ³ Jò au trùh , au hi thê bài mangai oh daq ma khoe ràih wê jàiq au ma achi h xam bác oh daq ma tagop aràng ta Jerusalem . ⁴ Tàng troq ka au lam , wì aih hi lam ti au .

⁵ Atiq ka au lam khoe ka Maxê-đoan , au hi trùh hmàih ka oh daq , majah qmang aih au ep thia ta Maxê-đoan . ⁶ Canau au loq oe ti oh daq ùh dùnh , tàng ùh meh clech ka ralim , òdeq oh daq jah ajèn aràng au lam tanoè au enh lam . ⁷ Yàng kô ùh xài au toq enh glàm oh daq hi hêq , mahaq tàng Chuaq lòh , au ngèh jah oe ti oh daq . ⁸ Mahaq yàng kô au oe ta Êpheso trùh ramènh Hì padam jât , ⁹ majah qmang aih , ta aih i mòeq toq qmang kân khoe pèch òdeq ka au hu abroq ,mahaq hadai i bacc ngai enh tablêq ka au .

Bầu tanap ...

¹⁰ Tàng Timothê trùh hmàih ka oh daq , pì hmàng ngan apaq òdeq haq i cleq ma ep crè jò haq oe ti pì : Majah qmang aih haq hanoh patih ka Chuaq tiah ka au diq . ¹¹ Apa q i cabô jù đac haq , ahlài haq ma catèm , òdeq haq jah trùh ta au , majah qmang aih au qnang gòm haq hloe xam oh daq qnoeq . ¹² Yàng manòeq kô , Abolô aih oh daq da bèn , au bác yàng àu thê haq lam tiaq wì oh daq kô òdeq lam trùh ta oh daq ,mahaq haq qnhòq lap lam . Mahaq haq lam jò leq haq hi dòh.

¹³ Oh daq hmàng hamang , yòng cajap manoh lù , ma hagau , ma tadêh haq oq . ¹⁴ Rìm yiniq oh daq broq , diq broq ta kan loq waq . ¹⁵ Manoeq kô , oe i moeq bầu tanap hòm : Oh daq loq hnim Sêphana aih pì ma ramua ta gùng Achai , pì diq loq mangai ta hnim aih diq ka manoh patih ka mangai da Chuaq . ¹⁶ Khòh loq ta iu bài mangai qmang aih , khòh ta iu diq đống bài mangai hanoh patih xalep ti bèn . ¹⁷ Sêphana , Photu-na xam Achaico trùh ta kô , au bùi haraya , wì aih khoe aràng am ka au bài dahwêq oh daq ùh i aràng . ¹⁸ wì aih khoe broq ka manoh au xam manoh oh daq jah blinh hlài . Khòh padêch bài mangai qmang aih .

¹⁹ Bài Tagop Hadròeh oe ta gùng Asi bòch hmàih trùh pì , enh dalam ka Chuaq, Aquila xam Bêritsin tanap bầu hmàih trùh pì ,Tagop Hadròeh oe ta hnim wa aih hanoh . ²⁰ Diq đống oh daq ta kô bòch hmàih ka pì . Drah yốc kan hip hadròeh òdeq hmàih da bau .

²¹ Au kô Phaulo , ti kống cla au achi h jàiq kô bòch hmàih oh daq .

²² Tàng mangai leq ùh ta iu ka Chuaq , mangai aih ep pòq kan “anathem”!
Maranatha !

²³ Waiq kan tabàih da Chuaq oe ti pì oh daq ²⁴,kan loq waq da au oe ti rìm ngai oh daq enh dalam yiniq Chuaq Jesus Christ